



# Anak nelayan terima anugerah pelatih terbaik Kor SUKSIS UKM

Oleh **Nor Azizah Mokhtar** - Disember 27, 2022 @ 5:36pm  
[bhnews@bh.com.my](mailto:bhnews@bh.com.my)



Anugerah Pelatih Terbaik Keseluruhan Kor Sukarelawan Polis Siswa Siswi (SUKSIS) UKM, Muhammad Azhar Mohamad Roslee (tengah), Anugerah Pelatih Terbaik (Latihan Luar), Nur Adawiyah Zainal (kiri) dan Anugerah Pelatih Terbaik (Akademik), Amirul Akmal Farooq Aminuddin pada majlis tamat latihan dan penyampaian sijil pentaulahan inspektor Kor SUKSIS UKM di Dewan Auditorium Pusat Genius@Pintar Negara UKM. - Foto SAIFULLIZAN

BANGI: Walaupun lahir sebagai anak seorang nelayan, tidak menghalang Muhammad Azhar Mohamad Roslee untuk merangkul kejayaan dalam akademik, malah diangkat sebagai Pelatih Terbaik Keseluruhan Kor Sukarelawan Polis Siswa Siswi (SUKSIS) Universiti Kebangsaan Malaysia (UKM), hari ini.

Selain cemerlang dalam bidang kokurikulum, pemuda berusia 22 tahun dari Muar, Johor itu juga menamatkan pengajian Sarjana Muda Keusahawanan dan Inovasi dengan mendapat Ijazah Kelas Pertama, baru-baru ini.

"Bukan mudah untuk mengimbangi antara pelajaran dan Kor SUKSIS tetapi saya anggap ini sebagai satu cabaran dan Alhamdulillah dengan bantuan keluarga, rakan-rakan serta semua jurulatih SUKSIS, semuanya dapat diatasi.

"Pembabitan dalam Kor SUKSIS sedikit sebanyak mendisplinkan diri saya dalam menguruskan masa dan paling utama, dapat mempelajari ilmu baharu iaitu ilmu kepolisan," katanya ketika ditemui BH, hari ini.

Beliau yang kini bekerja sebagai jurujual sebuah syarikat swasta merancang untuk menceburi bidang kepolisan dengan menyertai Polis Diraja Malaysia (PDRM) dan berharap akan mendapat tempat pada pengambilan akan datang.

Terdahulu, seramai 66 Inspektor Kor SUKSIS UKM ditauliahkan dalam Majlis Tamat Latihan dan Penyampaian Sijil Pentaulahan yang disempurnakan Ketua Polis Selangor, Datuk Arjunaidi Mohamed.

Keseluruhan, seramai 67 pelatih Skuad 15/2019-2022 Kor SUKSIS UKM berjaya menamatkan latihan dan 66 daripadanya menerima sijil pelantikan pada hari ini.

Yang turut hadir, Ketua Jabatan Pencegahan Jenayah dan Keselamatan Komuniti (JPJKK) Selangor, Senior Asisten Komisioner Mohd Zaini Abu Hassan dan Komandan Kor SUKSIS UKM, Asisten Komisioner/Kor SUKSIS Prof Madya Dr Mohd Suzeren Md Jamil.

Arjunaidi dalam ucapannya berkata, pelatih Kor SUKSIS perlu menjalani latihan selama tiga tahun membabitkan modul yang perlu dilalui selama 672 jam secara keseluruhan.

"Pelatih Kor SUKSIS ini bukan sahaja aktif dalam pasukan beruniform, malahan cemerlang dalam akademik.

"Saya bangga apabila dimaklumkan seramai 23 daripada 67 pelatih Kor SUKSIS atau 35 peratus daripada mereka mendapat Ijazah Kelas Pertama pada kali ini," katanya.

Dalam pada itu, beliau berharap pegawai Kor SUKSIS UKM menceburkan diri dalam bidang kepolisan dengan menjadikan kerjaya kepolisan sebagai pilihan.

Pada majlis sama, dua pelatih turut menerima anugerah utama iaitu pelajar Sarjana Muda Sains Nuklear, Amirul Akmal Farooq Aminuddin dengan Anugerah Pelatih Terbaik Akademik, manakala pelajar Sarjana Muda Pendidikan Khas, Nur Adawiyah Zainal menerima Anugerah Pelatih Terbaik Latihan Luar.